



ATASSUT
Postboks 399
3900 Nuuk
+299323366
Fax: +299325840
Atassut@greenet.gl
www.atassut.gl

8. marts 2010

Arnat ulluanni pilluaqqussut

Kalaallit Arnat inissisimalluarnersi inuiaqatigiinni nukittoqqutigilluarparput – qujanaq!

Asasagut arnat kalaallit.

Nunarsuarmi arnat pisinnaatitaaffimminnik sorsuutiginniffianni ATASSUT-mit qamannga pisumik pilluaquassi ullorsiorluarnissassinillu kissaallusi, ullumimi ulloq ilissi pigaarsi taamaammat oqariartuutisi naalaarluassavagut.

Inuiaqatigiit kalaallit ukiut ikittuinnaat ingerlanerini ineriartupiloorneranni nukittuumik inissikkiartuaarnitsinni ilissi arnartavut annertuumik qujassutissaqarfigaassi, ilissimi pissutaalluinnarlusi meerartagut inuusuttortagullu tunngavissinneqarluarput ilinniarluarsimallutik inuiaqatigiinni suliassanik kivitseqataasinnaangorsarlutik.

ATASSUT aallartimmalli ilaqutariit qitiusumik inissisimanerat pingaartilluinnarlugu sulivugut sutigullu tamatigut ilaqutariit ingerlalluarnissaannut inatsisistigut sinaakkusersuilluartoqarnissaa suliassatta pingaarnersaanut ilaajuarpoq, taamaammat nuannaarutigisatsinnik naartunermut erninermullu atatillugu angajoqqaat sapinngisamik sivisunerpaamik merlertortaminnik eqqissillutik najuisinnaanerisa qujakkeersimajuarneqarnissaa ATASSUT-mit pingaartilluinnarparput.

Ilaqutariilli suli pitsaanerusumik inuuneqarnissaannut miserratisassaannngitsumik annertuumik suliassaqpugut:

- Arnat angerlarsimaffinni tujormisitaasartut allaallumi persuttagaasartut ikigisassaangillat, angutinut nukersorniartartunut sakkortuumik kaammattuutigissavarput ajornartorsiornermi persuttaaneq atornagu oqaloqatigiinneq paaseqatigiinniarnarlu aqutigisaqqullugit.
- Ilaqutariit ajornartorsiorlut isumaginninnikkullu navianartorsiorlut pisortanit ilaannakortumik sullinneqartarnerat qaangerneqartariaqarpoq ilaqutariimmi ajornartorsiorlut avissaartuutsillugit immikkut ikiorniarneqartarnerat pitsaanngilaq, ataatsimoortumik sullinneqarunik ataatsimoorlutik

ajornartorsiutiminnit aniguniarnissaminnut sakkussanik nukissanillu tunineqartarput, taamaammat pisortanut kaammattuutigissavarput ilaqutariit sullinneqarnerini ataatsimoortumik sullissineq tamatigut isumannaarniartaqqullugu.

- Arnat inuuussutissarsiornermi naligiissitaallutik ingerlanissaat tamakkiisumik anguneqarnikuunngilaq, suli ajoraluartumik arnat, pingaartumik arnat qitorniornerup nalaanniittut tunulliutitaasarput, sulisitsisunullu kaammattuutigissavarput sulisussarsiornerminni arnat mattunniartaqqunagit.
- Inatsiseqaraluarput suliffeqarfinni ingerlatseqatigiiffinnilu pisortat pigisaanni siulersuisuni arnat angutillu naligiissitaassasut, taamaattorli tamanna qaangiataaginnarlugu siulersuisunik ivertitsisarnerit suli nalinginnaavallaarput, taamaammat Naalakkersuisunut kaammattuutigissavarput arnat siulersuisuni peqataanerulernissaat siunertaralugu sulissuteqaqqullugit.

Oqaasissat suli arlaliissuugaluarput, taamaattorli ATASSUT-mit ullumikkut ulloq arnartatsinnut naalaarnermut atussavarput, naggataatigullu ullorsiorluarnissassinnik kissaateqqissavassi.

Gerhardt Petersen

Siulittaasoq